

# Burgais dad emprima e segunda classa

Alessandro Della Vedova ha tematisà il foss social chaschunà da la digitalisaziun

DAD ANDREAS CADONAU / ANR

**Il president dal cussegl grond, Alessandro Della Vedova, ha tematisà il destin da personas nun ablas d'applitgar ils servetschs electronics e che pon perder uschia l'access a la societad. Cun sias explicaziuns ha il president dal cussegl grond avert il glindesdi passà la sessiun dal december.** Tge capita sch'ins n'è betg svelt avunda da star si cur ch'il postin scalina? Ina dumonda tschentada dal president dal cussegl grond, *Alessandro Della Vedova*, en ses pled d'avertura da la sessiun dal december il glindesdi passà avant il cussegl grond. Tematisà ha Della Vedova l'influenza da la digitalisaziun en la societad. El è persuadì ch'i nun haja anc mai dà in temp nua che las innovaziuns sajan vengidas introducidas uschè svelt ed uschè spontan. Innovaziuns ch'hajan midà cumpletmain noss stil da viver. Della Vedova attribuescha quel svilup a las novas apparatusas ubain a las novas funcziuns che derivan tuttas dal mund electronic. Ed il president dal cussegl grond ha tschentà il svilup visavi a la persuna che nun è svelta avunda en pe per contactar il postin che scalina. En il mument che quella persuna è a l'isch-chasa è il postin davent e cun el brevs recumandadas e pachets che nun han plaz en la chasa da brevs. «Sch'ins vless delegar insatgi dad ir a prender l'atgna posta pon ins far quai mo sur l'internet.» Tge èsi, sa dumonda Della Vedova, sch'ina persuna ha stress e na sa betg far diever dal com-

puter per cumprar in bigliet per il tren? Vinavant è il president dal cussegl grond sa dumandà tge personas che na possedian betg ina app per far las cummissiuns en il supermartgà. Che na pajan betg lur quintes via e-banking e che na cumprian betg tut il pussaivel via l'internet. Nostalgichers incurregibels da l'era analogica, u anc mender, personas che sa dostan aposta cunter il progress?

## Per regla seniors u personas cun in impediment

Nagut da nostalgichers, manegia Della Vedova, mabain per regla senioras e seniors u personas cun impediments che nun han in computer, nagina colliaziun d'internet, nagin smartphone. U che nun è simplamain en il cas da sa render sez en ils biros che sa chattan en il center dal vitg. Personas che vivan pervia da quai en ina spezia da limbo che po – en vista a tscherts basegns – svelt sa midar en in enfiern. Il president dal cussegl grond vesa la societad attaschada a la digitalisaziun confruntada en l'avegnir cun appels dramatics da personas che restan inevitablamain enavos perquai ch'ellas na possedan nagin computer u èn memia pauc mobilas. La realitad che divide la societad en burgaisas e burgais dad emprima e segunda classa daventia en quel mument nun-supportabla e schizunt inacceptabla cura ch'ella pertutgia il survetsch public, principalmain la posta ed il traffic public. En quel connex fan las mesiras da spargn tscherts quitads a Della Vedova. Mesiras pretendidas sin plaun statal per gulivar ils



**Il president dal cussegl grond, Alessandro Della Vedova, ha rendi attent a la part da la populaziun senza access a l'internet u cun fadia dad applitgar il computer e ses servetschs.**

FOTO O. AEBLI-ITEM

minus d'entradas d'attribuir a las refurmas fiscalas. Tenor il president dal cussegl grond fissi malgist e betg da giustifitgar sche precis quella gruppa da la popula-

ziun stuess pajar il pretsch per tut quai. Senioras e seniors probablamain disads il pli fitg vi da grevazzas corporalas, ma che san ir enturn main bain cun stentas psi-

chicas che resultan da las midadas andetgas, ha Della Vedova ditg avant il cussegl grond ed avert cun sias objecziuns la sessiun dal december.